

# EPOKA

# ERE

E përditshme e pavarur  
Viti XXIV, nr. 7890  
E martë, 24 shtator 2024  
Çmimi 0.50

26 vjet nga rënia e heronjve Fehmi dhe Xhevë Lladrovci dhe dëshmorëve të tjerë | FAQE 6



Na ndiqni edhe në:  
[www.epokaere.com](http://www.epokaere.com)  
facebook.com  
Gazeta "Epoka e re"



## KOSOVA KA RËNIE SA I PËRKET LIRISË SË MEDIAS DHE SIGURISË SË GAZETARËVE



Gjatë vitit 2023 Kosova ka përjetuar rënie të paparë sa i përket sigurisë së gazetarëve dhe lirisë së medieve, ndërsa sfidë ka qenë raportimi nga

veriu i vendit, ku gazetarët atje janë sulmuar dhe kërcënuar. Kështu u tha në publikimin e raportit vjetor "Treguesit e nivelit të lirisë së

medieve dhe sigurisë së gazetarëve", organizuar nga Asociacioni i Gazetarëve të Kosovës (AGK)

**DEPUTETI I KANTONIT JURA NË ZVICËR THOTË SE THAÇI PO MBAHET NË HAGË SI NË PRAKTIKAT E NJË REGJIMI TOTALITAR**

F. 3



**SHOIPTARËT E LUGINËS MARSHOJNË PËR "IDENTITET DHE DINJITET" DHE KUNDËR DISKRIMINIMIT**

F. 3



**RENOVA**  
PUTZ  
Maqedoni  
Xhepçisht - Tetovë  
Gurëz-Ferizaj  
Tel: +389 44 487 300; +389 44 487 009  
+389 44 487 755  
Fax: +389 44 487 200  
E-mail: [renova@mt.net.mk](mailto:renova@mt.net.mk)  
Mobi: +377 44 501 289

**PRINCESHA**  
GROUP SH.P.K.  
NDËRTIM  
PROJEKTIM  
INFO: 049-111-101,  
044-511-177  
[www.princesha-ks.com](http://www.princesha-ks.com)

**Bunjamini**  
FABRIKA E LLAQEVE  
044/256-051  
044/367-061  
028/532-617  
STYROKOL · BUNJAKOL · EUROFASADË

### SPORT



**JANUZI PASI MERR ÇMIMIN 'YLLI I JAVËS': LLAPI LUFTON PËR TITULL**

F. 10

### EKONOMI



**KURTI TAKON PËRFAQËSUESIT E SHOQATAVE TË DIASPORËS NË ITALI: MËRGATA, URË EKONOMIKE**

F. 8

**MINISTRI I BUJQËSISË: KEMI PESËFISHUAR MBËSHTETJEN PËR FERMERËT ORGANIKË**

F. 8

### AKTUALE



**TRUMPI THOTË SE, NËSE HUMBET NË NËNTOR, S'DO TË GAROJË PËR PRESIDENT PËRSËRI**

F. 2

**TË ENJTEN KUVENDI MBLIDHET NË SEANCË PLENARE**

F. 5

**HARADINAJ PREMTON SE PAGA MË E ULËT NË FSK DO TË JETË 1 000 EURO**

F. 7

**LARGIMI I QYTETARËVE TË KOSOVËS NË HESHTJE, MË I RREZIKSHËM SE EKSODI**

F. 7

**Kolegji BIZNESI**  
[www.kolegji.biznesi.com](http://www.kolegji.biznesi.com)  
info@kolegji.biznesi.com  
038 500 878 | 045 500 878  
044 500 878 | 049 500 878

**SIGMA**  
VIENNA INSURANCE GROUP  
SIGMA INTERALBANIAN VIENNA INSURANCE GROUP SH.A  
DEGA KOSOVË  
Rruga "Pashko Vasa", p.n Prishtinë, Kosovë.  
Tel: +381 (0)38 246 301 Fax: +381 (0)38 246 302,  
E-mail: [info@sigma-ks.net](mailto:info@sigma-ks.net) | [www.sigma-ks.net](http://www.sigma-ks.net)

**INFINITY**  
Digital Agency  
Endrit Shaqiri  
+38344685122  
Internet Website,  
Marketing...

# Trumpi thotë se s'do të garojë për president përsëri, nëse humbet në nëntor

WASHINGTON, 23 SHTATOR - Ish-presidenti i Shteteve të Bashkuara, Donald Trump, ka thënë se nuk beson se do të garojë për president në vitin 2028 nëse pëson disfatë në zgjedhjet presidenciale amerikane më 5 nëntor.

Trump, 78 vjeç, ka qenë kandidat i republikanëve në tri palë zgjedhje presidenciale radhazi dhe e ka ndryshuar partinë dukshëm në tetë vjetët e fundit.

Në një intervistë për "Sinclair Media Group" të dielën, Trump u pyet nëse parashikon se do të garojë edhe një herë në rast se humbet kundër kandidatës demokrate Kamala Harris. "Jo, mendoj se jo. Me kaq do të mbarojë. Nuk mendoj se do ta bëj", u përgjigj Trump.

Por, ai shtoi se "shpresoj se ne do të jemi shumë të suksesshëm" në zgjedhjet e nëntorit.

Ligji amerikan ua ndalon presidentëve mbajtjen e më shumë se dy mandateve, prandaj Trumpi nuk do të garonte më 2028 as në rast fitoreje këtë vit.

Trumpi përballet me garë të fortë kundër demokrates, nënpresidentës amerikane Kamala Harris, pasi

sondazhet po tregojnë se gara mes tyre është tejet e ngushtë në shtetet kryesore, të cilat me gjasë do të jenë vendimtare në përcaktimin e fituesit, edhe pse Harris ka filluar ta krijojë një epërsi në sondazhet gjithëkombëtare.

Trumpi e nisi fushatën e parë për t'u kthyer në Shtëpinë e Bardhë më 2020, në ditën e njëjtë që ishte inauguruar më 2017, ndërsa fushatën e dytë për t'u rizgjedhur e nisi para dy vjetëve, në nëntor 2022.

Trump rrallëherë e ka pranuar mundësinë e humbjes në zgjedhje. Ai ka vazhduar të pretendojë rrejshëm se humbi më 2020 kundër presidentit Joe Biden për shkak të vjedhjes së votave dhe përballet me akuza për vepër penale në lidhje me përpjekjet e tij për ta zhbërë rezultatin e atyre zgjedhjeve.

Ai i ka mohuar akuzat dhe e ka cilësuar aktakuzën kundër tij si sulm politik.

Ndërkohë, Harris, 59-vjeçare, e emërua kandidatë e demokratëve pasi presidenti Joe Biden u tërhoq nga gara muaj më parë.



# SPD-ja e Scholzit i fiton zgjedhjet teksa ekstremi i djathtë vazhdon rritjen

BERLIN, 23 SHTATOR - Derisa është larg kapërcimit të vështirësive, kancelari i Gjermanisë, Olaf Scholz, mund të ndihet i lumtur së paku pas zgjedhjeve të së dielës në Brandenburg, landin e ish-Republikës Demokratike të Gjermanisë, i cili kufizohet me kryeqytetin federal, Berlin.

Partia e tij e Socialdemokratëve (SPD), e cila e ka udhëhequr këtë land që nga ribashkimi i Gjermanisë, ia doli të zërë vendin e parë përsëri, pasi kishte ngelur mbrapa partisë së ekstremit të djathtë, Alternativa për Gjermaninë (AfD), pothuajse gjatë gjithë fushatës.

Në fund, SPD-ja i fitoi 30.9 për qind të votave, duke shënuar përmirësim krahasuar me 26 për qind sa i kishte fituar para pesë vjetëve, dhe e la AfD-në mbrapa në vendin e dytë me 29.2 për qind të votave.

Ky rezultat është lehtësim afatshkurtër për Scholzin në shumë mënyra. Ai jeton në Potsdam, kryeqytetin e Brandenburgut, dhe partia e tij më në fund shënoi një fitore pas rezultateve të tmerrshme në Turingi dhe Saksoni, dy landët e ish-Gjermanisë Lindore, para tri javëve, ku mezi mbijetoi.

Në javët e fundit ka pasur seç herë e më shumë pikëpyetje për atë se sa gjatë mund të udhëheqë qeveria federale pas rezultateve kaq të dobëta. Megjithatë, tani duket se të paktën mund të arrijë disi në zgjedhjet e përgjithshme, të planifikuara për shtatorin e vitit



2025. Çështja, megjithatë, është se sa shumë merita duhet të marrë Scholzi për këtë rezultat. Ai e ka ndryshuar tonin në javët e fundit, në përpjekje për t'i adresuar druajtjet rreth emigrimit dhe skepticizmit për Ukrainën, të cilat mbizotërojnë në pjesën më të madhe të elektoratit, kryesisht në pjesën lindore të vendit.

Ai ka folur më zëshëm rishtazi për bisedime për paqe, në të cilat duhet të përfshihet edhe Rusia, ndërsa në fillim të shtatorit ai i riktheu kontrollat kufitare në të gjithë kufijtë e Gjermanisë, në

tentim për ta luftuar emigracionin pas një sulmi vdekjeprurës me thikë në qytetin perëndimor, Solingen, në gusht, për të cilin përgjegjësinë e mori Shteti Islamik.

Prapëseprapë, në shumë aspekte, rezultati përfundimtar duket të jetë arritur falë një kombinimi mes njerëzve që kanë votuar për partinë e tij si zgjidhja e fundit për ta parandaluar AfD-në nga fitorja dhe popullariteti i kryeministrit të tanishëm të Brandenburgut, Dietmar Woidke, i cili, edhe pse është bashkëpartiak i Scholzit, e shpërfilli atë gjatë fushatës dhe e

kritikoi qeverinë federale.

Gjithashtu, ia vlen të theksohet se dy partnerët e koalicionit federal, të Gjellbrit dhe Partia Liberale FDP, dështuan plotësisht në Brandenburg. E para i mori 4.1 për qind të votave dhe kështu dështoi ta kalojë pragun prej 5-përqindësh për t'u përfaqësuar në parlamentin e landit, ndërsa FDP-ja i mori 0.8 për qind të votave, që është rezultati më i dobët ndonjëherë në zgjedhje rajonale. Dhe derisa AfD-ja dështoi të dalë e para në Brandenburg, ajo shënoi rritje përsëri. Nuk ka dyshim se kjo parti është prapëseprapë fituesja

më e madhe pas zgjedhjeve në landët lindore në shtator. Ajo përfundoi në vendin e dytë shumë pranë fituesit në dy prej tyre dhe u bë partia e parë e ekstremit të djathtë prej Luftës së Dytë Botërore që e fiton një land, Turinginë. Natyrisht, pjesa lindore e vendit dallon shumë, sepse një pjesë e madhe e elektoratit është kundër emigracionit dhe ka ndjenja më të ngrohta karshi Moskës.

Kjo u pasqyrua nga suksesi i partisë së re majtiste, BSW (Sahra Wagenknecht Alliance), e cila doli e treta në Brandenburg me 13.5 për qind të votave të fituara, dhe ka qëndrime shumë të ngjashme politike me AfD-në.

Në nivel federal, partitë e ekstremit të majtë dhe ato të ekstremit të djathtë mund t'i fitojnë një të tretat e votave. Ato, megjithatë, do të kenë ndikim në lojtarin më të madh ekonomik të BE-së para zgjedhjeve, duke i bërë trysni për emigracionin dhe Ukrainën.

Dhe kjo nuk po ndodh vetëm në Gjermani. Populisti çek Andrej Babis doli mirë në zgjedhjet rajonale të mbajtura fundjavën e njëjtë si votimi në Brandenburg, dhe ai duket të jetë në pozitë të mirë për t'u bërë kryeministër i vendit vitin e ardhshëm. Austria do të mbajë zgjedhje parlamentare fundjavën e ardhshme.

Atje, partia populiste e ekstremit të djathtë, Partia e Lirisë (FPO), është duke prirë bindshëm në sondazhe. Evropa është duke i shikuar interesat e veta tani.

# Deputeti i kantonit Jura në Zvicër thotë se Thaçi po mbahet në Hagë si në praktikat e një regjimi totalitar

PRISHTINË, 23 SHTATOR - Raoul Jaeggi, deputet i kantonit Jura në Zvicër, ka reaguar në "Facebook" rreth Gjykatës Speciale, veçanërisht për paraburgimin e ish-presidentit Hashim Thaçi. Procesi i tejzgjatur gjyqësor kundër ish-presidentit Thaçi konsiderohet si regjim totalitar dhe antidemokratik nga deputeti i kantonit Jura, Raoul Jaeggi, i cili është pjesë e legjislativit kantonial nga viti 2009. "Hashim Thaçi është paraburgosur për gati katër vjet

në kushte që të kujtojnë praktikat e një regjimi totalitar, ku drejtësia preventive zvarritet pafundësisht, duke shkelur parimet themelore të të drejtave të njeriut", ka shkruar Jaeggi. Sipas tij, ky paraburgim i zgjatur pa dënim përfundimtar jo vetëm që është i padrejtë, por ai minon vetë vlerat e demokracisë dhe respektimin e të drejtave individuale. "Është për t'u habitur se, ndryshe nga ata që kërkojnë t'i shpëtojnë drejtësisë, Hashim Thaçi dha dorëheqje si president i Kosovës



për t'u përballur me akuzat ndaj tij. Kjo sjellje është e kundërta me atë të autorëve tipikë, të cilët përdorin fuqinë e tyre për ta shmangur përgjegjësinë. Thaçi zgjodhi të bashkëpunojë plotësisht me drejtësinë, një gjest i rrallë dhe i guximshëm", ka shkruar Raoul Jaeggi, deputet

kantonial në Jura që nga viti 2009. Ai ka shtuar tutje se: "Nëse Thaçi ka qenë fajtor për krimet për të cilat akuzohet, është për t'u habitur që ai nuk ka adoptuar strategjinë e ikjes dhe vetëmbrojtjes që kanë zgjedhur shumë liderë të tjerë të akuzuar për krime të rënda. Në vend të

kësaj, ai vullnetarisht iu dorëzua drejtësisë ndërkombëtare, një provë tjetër e dëshirës së tij për ta demonstruar pafajësinë e tij. Një sjellje e tillë meriton të njihet dhe ngre pyetje në lidhje me legjitimitetin e paraburgimit preventiv kaq të gjatë", ka shkruar Jaeggi.



## Shqiptarët e Luginës marshojnë për "identitet dhe dinjitet" dhe kundër diskriminimit



PRISHTINË, 23 SHTATOR - Qindra shqiptarë nga Lugina e Preshevës në jug të Serbisë kanë marshuar të hënën për, siç kanë thënë ata, kundër diskriminimit dhe në kërkim të barazisë dhe të drejtave të shqiptarëve në Serbi. Një nga organizatorët e marshit tha se "nga këtu dërguam porosinë se shqiptarët duan barazi, se barazia padrejtësi nuk bëhet. Kërkesat e shqiptarëve janë të kamotshme. E kamotshme është edhe heshtja e shtetit dhe padrejtësia që po ua bëjnë shqiptarëve".

Ajo tha se kërkesat janë kthimi i gjykatës, zbatimi i marrëveshjeve të deritashme, kthimi i adresave të shqiptarëve në Preshevë, Bujanoc dhe Medvegjë, njohja e integrimi i shqiptarëve në organet shtetërore. Serbia e ka mohuar vazhdimisht se shqiptarët në këtë vend janë të diskriminuar. Ata marshuan nëpër qendrën e qytetit të Preshevës pranë institucioneve duke mbajtur pankarta me mbishkrime si: "Stop pasivizmit selektiv", "Duam

libra shqip" dhe "kthema adresën", si dhe të veshur me fanella me mbishkrimin "Për identitet dhe dinjitet". Marshi, të cilit i prin përfaqësuesi i vetëm i shqiptarëve në Parlamentin e Serbisë, Shaip Kamberi dhe kryetarja e Preshevës, Ardita Sinani, ndaloi pranë ndërtesës së komunës së Preshevës, ku u këndua himni kombëtar shqiptar. Kjo është protesta e dytë e shqiptarëve të Luginës në dy muajt e fundit, pas asaj në Bujanoc në gusht.

## BDI-ja: Shqiptarët nuk do të jenë vegla të skenarëve të tjerëve!

SHKUP, 23 SHTATOR - Bashkimi Demokratik për Integrim, nëpërmjet një komunikate për medie, ka theksuar "se shqiptarët nuk do të jenë vegla të skenarëve të tjerëve dhe për partitë shqiptare në pushtet". Nga BDI thonë se "në vend që të ndërtojnë politika që u shërbejnë interesave kombëtare të shqiptarëve, këto subjekte janë bërë vegla të forcave që synojnë t'i dëmtojnë interesat tona". "Pas zbulimit të turpshëm të djeshëm, ku deklaratat e disa partive shqiptare dolën se janë shkruar në selitë e partive maqedonase dhe më pas

janë dorëzuar për ta sulmuar BDI-në dhe liderin tonë, Ali Ahmeti, duam të nënvizojmë se ky akt ka shkaktuar zemërim dhe indignatë të thellë në mesin e shqiptarëve. Shqiptarët nuk do të pranojnë kurrë që të përdoren si vegla në skenarë të shkruar në selitë e partive maqedonase. Në vend që të ndërtojnë politika që i shërbejnë interesave kombëtare të shqiptarëve, këto subjekte janë bërë vegla të forcave që synojnë të dëmtojnë interesat tona. Ky është një sulm jo vetëm ndaj një partie apo një individi, por një përpjekje për të ulur dinjitetin dhe aspiratat kombëtare të shqiptarëve", thuhet në

komunikatën e BDI-së. BDI-ja ka theksuar se mbetet e vendosur për mbrojtjen e interesave të shqiptarëve, me transparencë dhe dinjitet. "Nuk do të lejojmë që këto manovra të ulëta të na ndalin në rrugën tonë drejt përmbushjes së aspiratave të shqiptarëve për barazi dhe përfaqësim të drejtë. Ftojme të gjithë qytetarët shqiptarë të vazhdojnë të qëndrojnë të bashkuar dhe vigjilentë ndaj këtyre përpjekjeve për të na përçarë dhe për të manipuluar opinionin publik. BDI dhe Ali Ahmeti do të vazhdojnë me përkushtim maksimal të udhëheqin kauzën shqiptare me



dinjitet, gjithmonë duke respektuar shqiptarët", ka përfunduar vullnetin dhe aspiratat e popullit shqiptar, ka përfunduar komunikatën e BDI-së.



## Kosova ka rënie sa i përket lirisë së medias dhe sigurisë së gazetarëve

Gjatë vitit 2023 Kosova ka përjetuar rënie të paparë sa i përket sigurisë së gazetarëve dhe lirisë së medieve, ndërsa sfidë ka qenë raportimi nga veriu i vendit, ku gazetarët atje janë sulmuar dhe kërcënuar. Kështu u tha në publikimin e raportit vjetor "Treguesit e nivelit të lirisë së medieve dhe sigurisë së gazetarëve", organizuar nga Asociacioni i Gazetarëve të Kosovës (AGK)

**EPOKA E RE**

**Qendresa RAMA**

**PRISHTINË, 23 SHTATOR** - Asociacioni i Gazetarëve të Kosovës (AGK) ka paraqitur të hënën raportin vjetor "Treguesit e nivelit të lirisë së medieve dhe sigurisë së gazetarëve", si dhe Indeksin e Sigurisë së Gazetarëve në Ballkanin Perëndimor për vitin 2023 në

kuadër të Platformës Rajonale SafeJournalists.

Raporti është hartuar nga hulumtuesja Getoarë Mulliqi, në bashkëpunim me Leonita Morina, asistente e projekteve, dhe përshkruan gjendjen e sigurisë së gazetarëve dhe çështjeve socio-ekonomike e politike në raport me lirinë e medias në Kosovë. Gjetjet e raportit që fokusohen

në tre tregues, kornizën ligjore, pozitën e gazetarëve në dhomën e lajmeve, si dhe sigurinë e gazetarëve, u prezantuan nga Mulliqi, Morina, si dhe eksperti ligjor i raportit, Yll Zekaj. Sipas gjetjeve të këtij raporti, Kosova ka përjetuar një rënie të paparë më herët sa i përket lirisë së medias dhe sigurisë së gazetarëve. Krahasuar me vitin 2022, ku janë

raportuar 33 raste, numri i sulmeve ndaj gazetarëve është rritur për 41, duke e bërë vitin 2023 vitin me numrin më të lartë të shkeljeve të lirisë së medias dhe sulmeve ndaj gazetarëve. Gazetarët që raportuan në komunat veriore janë përballur me kërcënime për jetën, sulme verbale dhe fizike, si dhe dëmtim të pronave personale dhe profesionale. Gjithashtu, në qershor qeveria ndërmori hapa për ta revokuar licencën e operimit të një prej televizioneve më të mëdha kombëtare, Klan Kosova. Rishikimi i licencës erdhi si pasojë e gjetjeve në dokumentacionin e korporatës

pronare nga Ministria e Tregtisë, Ndërmarrësisë dhe Industrisë. Organizatat e shoqërisë civile vendore, në bashkëpunim me praninë ndërkombëtare në Kosovë, arritën ta parandalojnë këtë vendim nga zbatimi, megjithatë kjo paraqet një kërcënim të paprecedent për lirinë e medias në Kosovë. Teksa si rekomandime të raportit u theksua nevoja që gazetarët t'i raportojnë të gjitha rastet e shkeljes së të drejtave të tyre, bashkëpunim më i mirë i institucioneve të Republikës së Kosovës me mediet, si dhe të krijohet sa më shpejt Sistemi i Menaxhimit të Lëndëve nga KGJK për rastet e gazetarëve.

## Votohet buxheti i Mitrovicës së Jugut për vitin 2025, Hamza paralajmëron projekte të rëndësishme

**MITROVICË, 23 SHTATOR** - Kryetari i Mitrovicës së Jugut, Bedri Hamza, ka njoftuar për votimin e buxhetit të komunës, duke paralajmëruar hapjen e rrugës "Ali Zeneli" dhe "shumë projekte të rëndësishme". "I lumtur që u votua buxheti i Mitrovicës së Jugut për vitin 2025 dhe që me votat e asamblistëve u krijuan mundësitë e hapjes së rrugës 'Ali Zeneli', ku jetojnë qindra familje, të cilën asnjë qeverisje lokale nuk kishte mundur ta hapte në këto dy dekada për shkak të vështirësive që janë të njohura për të gjithë mitrovicasit. Hapja e kësaj rruge do ta shkarkojë jashtëzakonisht shumë komunikacionin dhe do të hapë

perspektivë të re ekonomike për banorët e kësaj zone. Dhe, po ashtu, perspektivë të re do të hapin edhe shumë projekte të rëndësishme dhe me ndikim të madh në përmirësimin e jetës së qytetarëve që do të realizohen me buxhetin e miratuar për vitin e ardhshëm", ka thënë ai. Hamza i ka falënderuar asamblistët e të gjitha subjekteve politike në Kuvendin e Mitrovicës së Jugut për vendimmarrjen e përgjegjshme në të mirë të qytetarëve dhe komunës. "Me punë e përkushtim, duke i kuptuar drejt brengat e qytetarëve, ne po e përmbushim synimin tonë për ndryshimin e Mitrovicës!", ka thënë Hamza.



# Ambasadori Reka takon eurodeputetin austriak, i kërkon mbështetje për Kosovën

NJU-JORK, 23 SHTATOR - Shefi i Misionit në Konsullatën e Përgjithshme të Republikës së Kosovës në Nju-Jork, ambasadori Blerim Reka, ka pritur në takim eurodeputetin austriak Lucas Mandl, me të cilin ka diskutuar për zhvillimet në Kosovë, për mbështetjen e tij edhe në të ardhmen për shtetin e Kosovës. "Dje prita eurodeputetin austriak Lucas Mandl,

i cili në Nju Jork, po merr pjesë në samitin e OKB për të ardhmen (Summit of the Future). Duke i uruar rizgjedhjen në Parlamentin Evropian, i kërkoja mbështetjen për Republikën e Kosovës, shtetit më pro-perëndimor të Ballkanit. Në emër të 'stabilokracisë', nuk guxon të flijohet demokracia, e të shpërblehet autokracia", ka shkruar Reka në "Facebook".



## Të enjten Kuvendi mblidhet në seancë plenare

EPOKA  
ERE

Faton DËRMAKU

PRISHTINË, 23 SHTATOR - Të enjten, më 26 shtator, në orën 10:00, Kuvendi i Republikës së Kosovës do të mblidhet në seancë plenare për ta vijuar shqyrtimin e pikave të papërfunduara në seancat e kaluara. Kështu vendosi të hënën Kryesia e Kuvendit, në mbledhjen e përbashkët me kryetarë të grupeve parlamentare, të drejtuar nga kryetari Glauk Konjufca.

Seanca plenare e Kuvendit pritet të fillojë me emërimin e shtatë anëtarëve të Këshillit të Kosovës për Trashëgimi Kulturorë, për të vijuar me votimin e Projektligjit për

ratifikimin e Marrëveshjes së financimit, për programin e parë për "Financimin e politikave zhvillimore për efektivitetin fiskal, konkurrueshmërinë dhe rritjen e gjelbër", në mes të Republikës së Kosovës, e përfaqësuar nga Ministria e Financave, Punës dhe Transfereve dhe Asociacionit Ndërkombëtar për Zhvillim, shqyrtimin e Projektligjit për ratifikimin e amendamentit të Marrëveshjes për anëtarësimin e Republikës së Kosovës në Fondin Monetar Ndërkombëtar dhe organizatat e grupit të Bankës Botërore, si dhe shqyrtimin e Projektligjit për ratifikimin e Marrëveshjes së kredisë në mes të

Republikës së Kosovës dhe Bankës Evropiane për Investime për Projektin Energji diellore fotovoltaike në KEK - Porta Globale.

Pas votimit në lexim të dytë të Projektligjit për shëndetin riprodhues dhe fertilizim të asistuar mjekësor, si dhe atij për ndryshimin dhe plotësimin e Ligjit për Zyrarët Publikë, deputetët pritet të shqyrtojnë në lexim të dytë edhe tri projektligje të tjera: Projektligjin për Këshillin e Sigurisë të Republikës së Kosovës, Projektligjin për rrugët, si dhe Projektligjin për ndryshimin dhe plotësimin e Ligjit për të drejtat pronësore të shtetasve të huaj në

Republikën e Kosovës.

Në parim, ndërkaq, pritet të votohet Projektligji për gjendjen civile dhe ai për provimin e maturës shtetërore, për të vijuar me shqyrtimin e parë të Projektligjit për ndryshimin dhe plotësimin e Ligjit për automjete, si dhe atë për menaxhimin e resurseve ujore.

Pikë e radhës e rendit të ditës do të jetë shqyrtimi i Programit Kombëtar për Integrim Evropian 2024-2028 ndërsa, pas saj, votimi i Projekt-rezolutës për adresimin e gjetjeve të Raportit të Departamentit Amerikan të Shtetit-DASH.

Pjesë e rendit të ditës të kësaj

seance janë edhe shqyrtimi i Projekt-Deklaratës për raportet e Republikës së Kosovës me Shtetet e Bashkuara të Amerikës, shqyrtimi i Projekt-rezolutës për adresimin e çështjes së emigrimit të qytetarëve nga Republika e Kosovës, shqyrtimi i Projekt-Rezolutës për tërheqjen e tri projektligjeve nga shqyrtimi në Kuvend, shqyrtimi i Projekt-Rezolutës për arratisjen e personave të dënur - degradimi i institucioneve të sigurisë, shqyrtimi i Raportit me rekomandime për mbikëqyrjen e zbatimit të Ligjit për sponsorizime në fushën e kulturës, rinisë dhe sportit, i ndryshuar dhe plotësuar me Ligjin nr. 06/L-116, shqyrtimi i Propozim-rezolutës për vlerësimin e punës së Agjencisë për Informim dhe Privatësi për vitin 2022, shqyrtimi i Raportit të Performancës së ndërmarrjeve publike për vitin 2022, raportimi i Qeverisë së Republikës së Kosovës për progresin mbi zbatimin e Objektivave të Zhvillimit të Qëndrueshëm dhe reflektimin e Agjendës Transformuese të Kosovës në buxhet dhe politika qeveritare, si dhe themelimi i Komisionit Ad-Hoc për përzgjedhjen e kandidatëve për dy anëtarë të Bordit të Radiotelevizionit të Kosovës, prej tyre, një nga komuniteti shqiptar dhe një nga komuniteti serb. Kryesia në këtë mbledhje shqyrtoi edhe çështje të tjera nga fushëveprimtarja e saj.

## Ministrja Haxhiu dhe shefi i BE-së diskutojnë për rëndësinë e reformës në drejtësi

PRISHTINË, 23 SHTATOR - Ministrja e Drejtësisë, Albulena Haxhiu, ka pritur të hënën në takim shefin e zyrës së BE-së në Republikën e Kosovës, Aivo Orav, të cilit i uroi mirëseardhje dhe sukses në detyrën e re.

Gjatë këtij takimi ministrja Haxhiu e njoftoi ambasadorin Orav për punën dhe arritjet e deritanishme në Ministrinë e

Drejtësisë brenda mandatit, duke theksuar këtu reformën në drejtësi, luftimin e korrupsionit, adresimin e krimeve të luftës, parandalimin dhe adresimin e dhunës në familje dhe fuqizimin e Shërbimeve Sociale dhe Familjare si dhe ato të Profesioneve të Lira mes të tjerash.

Në takim është diskutuar për

rëndësinë e reformës në drejtësi dhe për çështje të tjera në kuptim të bashkëpunimit në forcimin e rendit dhe sundimit të ligjit në Republikën e Kosovës.

Në fund ministrja Haxhiu falënderoi ambasadorin e ri të BE-së në Kosovë për gatishmërinë dhe vullnetin për bashkëpunim dhe mbështetje për Republikën e Kosovës.





## Në Prizren përurohet aparati i mamografisë

Prizren, 23 shtator - Në vazhden e përpjekjeve për modernizimin e shërbimeve në qendrat e shëndetësisë publike në Komunën e Prizrenit, të hënën u përrua aparati i mamografisë në Qendrën

Kryesore të Mjekësisë Familjare, investim i Drejtorisë së Shëndetësisë, që përkon me fillimin e "Tetorit Rozë", muajit të ndërgjegjësimit për kancerin e gjirit. Ky projekt i rëndësishëm

për mirëqenien e qytetarëve është metodë kyçe për zbulimin e hershëm të kancerit të gjirit, ndërsa, krahas shërbimeve të specializuara dhe cilësore, kontrollet do të jenë falas për të gjithë.

## Rahoveci dhe Haraçina bashkëpunojnë për një të ardhme të gjelbër

RAHOVEC, 23 SHTATOR - Kryetari i komunës së Rahovecit, Smajl Latifi, ka marrë pjesë në konferencën e projektit ndërkufitar "Be Clean, Be Green", i cili do të zbatohet në bashkëpunim me komunën e Haraçinës nga Maqedonia e Veriut, i financuar nga Bashkimi Evropian. Sipas kryetarit Latifi, ky projekt dëshmon angazhimin e tyre për mbrojtjen e mjedisit dhe për një të ardhme të qëndrueshme. "Falënderoj partnerët, veçanërisht komunën e Haraçinës dhe kryetarin Ridvan Ibrahim, për bashkëpunimin dhe

për përkushtimin në këtë projekt. Në komunën e Rahovecit kemi nisur tashmë punimet për përmirësimin e infrastrukturës, përfshirë ndërtimin e sistemeve bioseptike në gjashtë fshatra: Pastasel, Pataqan i Ulët, Pataqan i Epërm, Polluzhë, Retijë dhe Rahovec (Lagjja I). Ky projekt do të ndikojë drejtpërdrejt në përmirësimin e cilësisë së jetës për qytetarët tanë dhe do të kontribuojë në ruajtjen e burimeve tona natyrore. Së bashku do të vazhdojmë për një mjedis më të pastër dhe të qëndrueshëm", ka thënë Latifi.



## Policia sekuestron tetë armë zjarri në rajonin e Prishtinës



PRISHTINË, 23 SHTATOR - Nga zyrtarët policorë të rajonit Prishtinës, gjatë javës së kaluar në lokacione të ndryshme e aksione të ndara, janë realizuar 233 urdhëresa të gjykatës, prej tyre 62 urdhëresa për vepra penale, ndërsa të tjerat për kundërvajtje, seanca, verifikime etj. Konform urdhëresave, pas

përfundimit të procedurave policore, personat e dënuar me burgim janë dërguar për vuajtje të dënimit, ndërsa personat e dënuar me gjobë janë liruar, pasi i kanë kryer obligimet e caktuara në urdhëresa. Aktivitete policore janë shtrirë edhe në segmente të tjera të sigurisë. Gjatë periudhës së njëjtë janë

sekuestruar 8 armë zjarri, të llojeve dhe kalibrave të ndryshëm. Ndërkaq aktivitetet policore në sferën e sigurisë në trafikun rrugor, në po të njëjtën periudhë kohore, kanë rezultuar me shqiptimin e 5 214 masave administrative me gjobë për lloje të ndryshme të kundërvajtjeve dhe shkeljeve të kodit rrugor.

## Inspektorët e Drenasit dalin në terren, vizitojnë barnatoret

DRENAS, 23 SHTATOR - Drejtorja e Inspeksionit në komunën e Drenasit, në vazhden e realizimit të planit, ka vazhduar mbikëqyrjen e barnatoreve lidhur me respektimin e orarit të punës si dhe kujdestarive. Në kuadër të vizitave të realizuara në qendrën e Drenasit si dhe në Komoran është konstatuar që disa subjekte tregtare nuk kanë respektuar orarin e kujdestarisë, ashtu siç është e përcaktuar nga Drejtorja për Zhvillim Ekonomik. Këtyre subjekteve tregtare u janë

dhënë vërejtjet e para paralajmëruese, ndërsa në rast të mosrespektimit të orarit do të vazhdohet me masat e parapara me ligj. Drejtorja e Inspeksionit inkurajon të gjithë qytetarët që në rast të hasjes së ndonjë parregullsie të çfarëdo natyre lidhur me shërbimin e barnatoreve, ta njoftojnë Inspektoratin për zbatimin e ligjit. Bashkëpunimi i qytetarëve shton efikasitetin e inspeksionit.



## Policia e Kosovës i arreston katër të dyshuar për trafikim të emigrantëve

Prishtinë, 23 shtator - Katër burra janë arrestuar të dielën për trafikim të emigrantëve, njoftoi Policia e Kosovës të hënën. Të dyshuarit, shtetas të Kosovës, u kapën në Mitrovicë të Jugut nga oficerët policorë duke transportuar pesë shtetas të Jemenit, të cilët kishin për synim t'i dërgonin drejt vendeve të Bashkimit Evropian.

Policia theksoi se ka bastisur një shtëpi dhe automjete, si dhe ka sekuestruar të holla dhe automjete. "Gjatë kontrollit të shtëpisë dhe automjeteve janë gjetur dhe sekuestruar: 6 280 euro, 7 300 lekë shqiptare, 140 CHF zvicerane dhe 4 automjete", thuhet në njoftim. Policia tha se të arrestuarit janë dërguar në mbajtje. Që prej vitit 2015 shtetet e Ballkanit Perëndimor janë

shndërruar në qendër transiti për personat që ikin nga Lindja e Mesme dhe Afrika dhe që synojnë të arrijnë në shtetet e Bashkimit Evropian. Kosova ka qendra për pranimin e emigrantëve, por shumica e tyre e përdorin këtë shtet vetëm si transit për në BE. Edhe në të kaluarën Policia e Kosovës ka arrestuar të dyshuar për trafikim të emigrantëve.



## Reagim i KMDLNj-së: Kush do t'i ndihmojë të burgosurit në Kosovë?!

Javën e kaluar në Q.S. në Gjilan vdiq një i burgosur i moshës afërsisht 80 vjeç, apo, që të jemi të saktë, i moshës 78 vjeçare. Sipas raporteve mjekësore i burgosuri ishte pranuar me probleme të rënda kardiake që edhe e shkaktuan vdekjen përkundër angazhimit të personelit shëndetësor të Qendrës së Paraburgimit në Pasjak të Gjilanit t'i shpëtojnë jetën. Rastet e përsëritura të vdekjes së të burgosurve për shkak të sëmundjeve të rënda duhet të zgjojë alarm te institucionet e Kosovës, përkatësisht te Ministria e Shëndetësisë dhe Ministria e Drejtësisë që të marrin veprime të menjëhershme në mënyrë që të mbrohet jeta e personave të privuar nga liria për faktin se që nga vendosja e tyre në këto institucione përkujdesja dhe përgjegjësia bie mbi këto ministri. Rastet e shpeshta të vdekjes së të burgosurve duhet të zgjojë nga

gjumi gjykatat që trajtojnë këto raste aq më parë që kemi të bëjmë me të burgosur me sëmundje të pashërueshme apo në moshë të pleqërisë së thellë. Këto raste duhet të trokasin edhe në ndërgjegjen e presidentes e cila, ndonëse ka të drejtë ekskluzive ligjore dhe kushtetuese deri më tani nuk ka falur asnjë të burgosur që nuk ka ndodhur as në regjimet më diktatoriale.

Nëse të burgosurit, për shkak se kanë rënë në kundërshtim me ligjin duhet të dënohen kjo nuk nënkupton se ata duhet të privohen nga të drejtat e njeriut të personave të privuar nga liria dhe nga mëshira e shtetit, që në raste të caktuara duhet të zbatohet.

E drejta për jetë dhe shërbime cilësore shëndetësore është e drejta kryesore e njeriut dhe mbi këto ngritën të gjitha të drejtat tjera. Shërbimi Shëndetësor i burgjeve nuk ka kapacitete profesionale e as të tjera të trajtojë

rastet e rënda ndërkaq që përgjegjësia për vdekjen e të burgosurve adresohet te ky shërbim, pa asnjë arsye dhe të drejtë. Për rastet e rënda, Shërbimi Shëndetësor i burgjeve varet nga Forenzika Psikiatrike apo QKUK sikur edhe nga Spitalet Rajonale që kanë kapacitet pranues shumë të reduktuar për pranim të të burgosurve sikur që për rastet me rrezikshmëri të lartë duhet një sigurim shtesë gjatë transportit dhe qëndrimit në institucionin shëndetësor. Gjykatat përkatëse shpërfillin skajshmërisht kërkesat e Shërbimit Shëndetësor të burgjeve për rastet me diagnozë terminale apo shkak i pleqërisë së thellë andaj edhe kemi raste të shpeshtuara të vdekjes së të burgosurve.

Prandaj, KMDLNj, duke trajtuar të drejtat e njeriut nga parimi i universalitetit dhe si të pandashme shpreh shqetësim të thellë për vdekjen e të burgosurve



për shkak të angazhimit të pamjaftueshëm të Ministrisë së Drejtësisë që e ka nën përgjegjësi Shërbimin Korrektes të Kosovës dhe Ministrisë së Shëndetësisë që e ka nën përgjegjësi Shërbimin Shëndetësor të burgjeve.

KMDLNj fton Komisionin Parlamentar për të Drejtat e Njeriut që me urgjencë të trajtojë

këto raste sikur që, në bazë të mandatit që e ka t'i vizitojë të burgosurit me gjendje të rëndë shëndetësore dhe pleqëri të thellë për faktin se atyre po u mohohen të drejtat elementare të njeriut, e drejta për jetë dhe shërbime shëndetësore sikur që Ligji për Ekzekutim të Sanksioneve Penale po zbatohet në mënyrë selektive.

## Largimi i qytetarëve të Kosovës në heshtje, më i rrezikshëm se eksodi

EPOKA  
ERE

Qendresa RAMA

PRISHTINË, 23 SHTATOR - Ish-kryetari i Odës Ekonomike të Kosovës, Safet Gërxhaliiu, ka thënë se largimi i qytetarëve të Kosovës në heshtje është më i rrezikshëm se eksodi. Ai ka theksuar se mungesa e stabilitetit politik dhe mungesa e perspektivës ekonomike dhe evropiane po e rrit ankthin e qytetarëve të Kosovës për të ardhmen e tyre.

"Masat ndëshkuese nga Bashkimi Evropian dhe paralajmërimet për luftë eventuale me Serbinë fusin ankth dhe panik te qytetarët. Në Kosovë po ndodh një largim masiv, por këtë herë në heshtje dhe pa shumë vëmendje. Pamjet nga pritjet në Aeroportin 'Adem Jashari' dhe aeroporti të rajonit, në veçanti Aeroporti i Shkupit gjatë gjithë vitit, tregojnë për një vlug të largimit nga Kosova. Ndërsa qeveria e justifikon këtë me pushimet verore apo vizitat familjare, realiteti është më i komplikuar. Kjo ikje është



reflektim i mungesës së perspektivës dhe ngufatjes që shumë të rinj dhe profesionistë po përjetojnë në vendin tonë", ka thënë ai.

Sipas tij, kjo ikje e heshtur përfaqëson një krizë të thellë mungese mundësish dhe shprese. "Të rinjtë e diplomuar dhe

profesionistët po largohen pa zhumë drejt vendeve të BE-së dhe përtej. Largimi i tyre është më i rrezikshëm se ndonjë eksod masiv, pasi ndodh pa u vënë re dhe pa reagim nga institucionet. Largimi po shkatërron ekonominë e Kosovës. Sektori privat po përballlet me sfida të mëdha për të

gjetur punonjës të aftë, ndërkohë që bizneset po mbyllen për shkak të mungesës së fuqisë punëtore dhe klientëve. Ikja e konsumatorëve dhe fuqisë blerëse po e varfëron më tej ekonominë tonë, duke e bërë të varur nga remitancat", është shprehur ai. Njohësi i ekonomisë ka thënë se

fluturimet nga Aeroporti "Adem Jashari" janë rritur 60% krahasuar me vitin e kaluar, pa i përfshirë ata që largohen përmes Shkupit. "Ndërsa qeveria nuk ka marrë masa për ta adresuar këtë krizë, duket se prioritetet e institucioneve janë të tjera. Përmes gjobave ndaj bizneseve duket se po kontribuojnë në zbrazjen e mëtejshme të vendit. Situatën aktuale e rëndon edhe më tepër lajmi se në verën e ardhshme është paralajmëruar zbatimi edhe i Sistemit të dytë Evropian të Informacionit dhe Autorizimit të Udhëtimit (ETIAS), i cili u kërkon udhëtarëve nga vendet që kanë regjim pa viza me BE-në, të aplikojnë online për lejen e hyrjes. Nëse kjo gjendje vazhdon, Kosova do të humbasë një pjesë të madhe të kapitalit të saj njerëzor, duke u kthyer në një vend me pak mundësi reale për të rinjtë dhe profesionistët. Ky largim i heshtur është një krizë që po minon themelet e shoqërisë dhe ekonomisë sonë", ka thënë Gërxhaliiu.

## Haradinaj premton se paga më e ulët në FSK do të jetë 1 000 euro

PRISHTINË, 23 SHTATOR - Kryetari i AAK-së, Ramush Haradinaj, ka thënë se një numër i madh i ushtarëve e kanë lëshuar Forcën e Sigurisë së Kosovës në vitin 2023 dhe 2024. "Mbi 11 për qind e ushtarëve lëshuan FSK-në vetëm në 2023 dhe 2024. Kjo është alarmante. I ftoj të qëndrojnë, sepse ne do ta ndryshojmë gjendjen", ka shkruar Haradinaj në "Facebook".

Ai ka thënë se në vitin 2023 numri i pjesëtarëve që e kanë

lëshuar FSK-në është 257. "Në vitin 2024, ka kaluar numri prej 200. I fundit nga ta më 19 shtator 2024. Shumica nga ta përmendin kushtet e vështira financiare dhe pagat e pamjaftueshme në arsyetimin pse lëshojnë Ushtrinë. Edhe pas 4 viteve të kësaj qeverie, numri i pjesëtarëve të uniformuar është nën 4.000, ndërsa forca rezervë e FSK-së është harruar pothuajse plotësisht", ka deklaruar Haradinaj.

Ai ka shtuar se është i shqetësuar seriozisht me këtë trajtim katastrofal që qeveria po i bën Ushtrisë sonë, të cilën me shumë mundësi kemi arritur ta mandatojmë më 2018. "Ftoj rininë t'i bashkohen FSK-së dhe ftoj pjesëtarët të qëndrojnë aty. Ne do ta përmirësojmë me urgjencë gjendjen e tyre financiare dhe kushtet elementare të punës. Qysh në muajt e parë të Qeverisë së re, paga më e ulët në FSK do të jetë 1000 euro", ka thënë Haradinaj.



## Ministri i Bujqësisë: Kemi pesëfishuar mbështetjen për fermerët organikë

PRISHTINË, 23 SHTATOR - Ministri i Bujqësisë, Faton Peci, ishte pjesëmarrës në konferencën e dytë për bujqësinë organike në Kosovë, me rastin e shënimit të Ditës Evropiane të Produkteve Organike. Ai ka thënë se ministria që drejton ka pesëfishuar mbështetjen për fermerët organikë. "Kemi rritur përkrahjen 400 % si dhe kemi hartuar Planin Kombëtar për

Bujqësinë Organike 2023-2026, duke e harmonizuar atë me standardet e BE-së. Përkushtimi ynë i përbashkët po jep rezultate konkrete. Vetëm gjatë vitit 2023 janë certifikuar 520 hektarë për prodhim organik, ndërsa eksportet organike kanë arritur vlerën prej 16.5 milionë eurosh. Falë bashkëpunimit me partnerët ndërkombëtarë dhe shoqatat vendore, po ndërtojmë

një të ardhme të qëndrueshme për sektorin e bujqësisë organike në Kosovë", ka thënë Peci.

Kryetari i Shoqatës "Organika", Fatmir Krasniqi, ka thënë se kanë arritur suksese të mëdha në këtë fushë duke eksportuar produkte organike me mbi 15 milionë euro. Jean-Christophe Favre nga Zyra Zvicerane për Bashkëpunim në Kosovë ka

theksuar se edhe pse Kosova është vend i vogël, është e vendosur për t'i ndalur sfidat globale me zgjidhje të guximshme.

E drejtori i Caritas-it Zviceran në Kosovë, Gerhard Schaumberger, ka thënë se duke marrë parasysh ndryshmet e shumta globale, është e rëndësishme të ketë rritje të konsumit të këtyre produkteve.



## Kurti takon përfaqësuesit e shoqatave të diasporës në Itali: Mërgata, urë ekonomike

VENECIA, 23 SHTATOR - Kryeministri Albin Kurti është takuar me përfaqësues të shoqatave të diasporës së Kosovës në Venecia të Italisë. Në bashkëbisedimin e tyre, është diskutuar mbi të tashmen dhe të ardhmen e Kosovës, përparimin që ka njohur vendi në tri vitet e fundit dhe perspektivën për avancim të mëtejshëm të zhvillimit ekonomik dhe investime, por edhe mirëqenie sociale. U bashkëbisedua edhe për mërgatën si urë ekonomike dhe kulturore ndërmjet shtetit të Kosovës dhe kombit shqiptar me Italinë dhe popullin italian. Kryeministri radhiti indikatorët pozitivë dhe premtues ekonomikë, ku përmendi rritjen mesatare ekonomike 6.2 %,



dyfishimin e eksporteve dhe investimeve të huaja direkte, krijimin dhe shtimin e vendeve të reja të punës, me fokus në punësimin e të rinjve dhe grave,

rritjen e qarkullimit të bizneseve. Ai shtoi se si qeveri janë përkujdesur që zhvillimi ekonomik të shpërndahet te të gjithë qytetarët pa dallim

përmes masave të ndryshme ekonomike të ndërmarra, për t'i ndihmuar nënat, studentët e familjet, por edhe tejkalimin e krizave globale me të cilat jemi

përballur. Duke shprehur vëmendjen e qeverisë ndaj diasporës dhe kontributin ekonomik madhor të saj për vendin përmes investimeve në Kosovë dhe punës në programe të ndryshme, kryeministri theksoi dhe iniciativat e ndërmarra nga qeveria për diasporën, si Shkolla për Diplomaci të Diasporës, platforma KosovaDiplo365, projekti Dritare për Investime të Diasporës e shumë të tjera. Kryeministri i falënderoi të gjithë pjesëmarrësit për takimin dhe bashkëbisedimin e ngrohtë. Në këtë takim kryeministri Kurti shoqërohej nga ambasadorja e Kosovës në Itali, Nita Shala dhe Konsulli i Përgjithshëm në Milano, Diamant Kastrati.

## Ndalimi i importit nga Serbia, Sarrazin: Kosova në rrezik të përjashtimit nga CEFTA



PRISHTINË, 23 SHTATOR - Kosova mund të përballet me kërkesa për përjashtim nga Marrëveshja e Tregtisë së Lirë të Evropës Qendrore (CEFTA) dhe masa të tjera ndëshkuese nëse vazhdon ta mbajë ndalimin e importit të produkteve serbe, paralajmëroi i dërguari gjerman për Ballkanin, Manuel Sarrazin.

Në një intervistë për "Ballkan Insight", Sarrazin shtoi se Kosova rrezikon izolim më të thellë. "Kosova mund të

përballet me thirrje për përjashtim nga Marrëveshja e Tregtisë së Lirë të Evropës Qendrore dhe ndëshkime të tjera nëse vazhdon t'i ndalojë importet serbe", tha Sarrazin. Më 5 shtator ambasadori i Gjermanisë në Kosovë, Jorn Rohde, tha se Sarrazin, në vizitën e tij të dytë në Kosovë brenda një afati të shkurtër kohor, i kishte kërkuar kryeministrit të Kosovës, Albin Kurti, ta heqë ndalimin e vendosur në qershor 2023 për importin e produkteve të

vendit. "Në këmbim të heqjes së ndalimit, Kosova nuk do të përfaqësohej më zyrtarisht në kuadër të CEFTA-s nga misioni i OKB-së në Kosovë, UNMIK, por do të përfaqësohej vetë". Megjithatë, sipas tij, emri i saj do të shkruhej si Kosovë\*, që të çonte në një fusnotë ku thuhet se statusi i Kosovës ende nuk është zgjidhur përfundimisht sipas Rezolutës 1244 të Këshillit të Sigurimit të OKB-së, duke reflektuar refuzimin e Serbisë për ta njohur atë si shtet të pavarur.

## Deputetja e LDK-së kërkon nga Kurti t'u tregojë qytetarëve për tenderët sekretë

PRISHTINË, 23 SHTATOR - Deputetja e LDK-së, Hykmete Bajrami, ka thënë se gjatë fundjavës që lamë pas kujdestarë për propagandë ishin Albin Kurti, Hekuran Murati dhe Armend Muja. Sipas saj, Albin Kurti, para se ta përmendë fjalën ekonomi, duhet t'u tregojë qytetarëve për 273 milionë euro të tenderëve sekretë. Ai, tha ajo, duhet të tregojë se si ka mundësi që për një rast korrupsioni në KEK, për t'u intervistuar qoftë edhe në cilësinë e dëshmitares, shkon



një zyrtare e lartë e IV-së, e cila nuk e ka asnjë funksion as në qeveri as në KEK. "Ajo ka funksion të lartë në parti. Çka duhet për të dëshmuar partia këtu? Edhe në cilësinë e dëshmitarëve do të ishte deri-diku e arsyeshme për t'u intervistuar, këshilltarët e Nagip Krasniqit, ata që punojnë në KEK se, mbase, e kanë udhëzuar gabimisht, me u intervistuar ata që punojnë në divizion të prokurimit, njësia e kërkesës, zyra ligjore apo cilido punëtor i KEK-ut, por me u

intervistuar dikush që asnjë lidhje zyrtare nuk e ka me KEK-un, qysh? Përveç kur prokurimi i 273 milionë eurove të tenderëve sekretë gatuhet në zyrat e LV-së, aty ku Dejana është zyrtarja më e lartë, siç tha Glauku, ajo i koordinon 'politikën profesionale' të LV-së. Albin, qytetarëve ju ke borxh këtë shpjegim, mandej flasim për ekonomi, sepse janë dy gjana që po e gërryjnë ekonominë tonë: korrupsioni dhe inflacioni", ka shkruar Bajrami në "Facebook".



# Sumerët dhe qytetërimi i parë në botë

Përgatiti: Vesel MAKOLLI  
(Pjesë nga libri *Historia e botës* e historianit k. Somerset Fry)

Në hartën e Lindjes së Mesme, shihen dy lumenj, Tigri dhe Eufirati. Të dytë rrjedhin pothuajse paralel nga Turqia, në një drejtim juglindor përmes Irakut, për t'u bashkuar në Kurna, duke formuar lumin që ne tani e quajmë Shat-el-Arab, i cili ka gjatësi rreth 170 kilometra deri te derdhja e tij në Gjirin Persik.

Fusha pjellore në mes të këtyre dy lumenjve quhet Mesopotamia (në greqisht do të thotë "midis lumenjve"). Këtu u vendosën njerëz me lëkurë të errët nga India veriperëndimore. Ata e quanin veten "njerëz me kokë të zeze, ose njerëz të Sumerit". Ata janë njerëzit e parë të qytetëruar në botë që lanë pas monumentet e shkruara.


Sumerët supozohet të kenë filluar të vendoseshin në Mesopotami rreth vitit 5000 para Krishtit. Ata e kuptuan se metali mund të punohej dhe ishin në gjendje të bënin shumë mjete të dobishme. Ata ishin fermerë të aftë, dhe në tokën pjellore të Mesopotamisë zhvilluan aftësitë e tyre bujqësore në një shkallë shumë të lartë. Ata korrnin nga arat e tyre shumë më tepër sesa kishin nevojë, kështu që filluan të tregtonin me fqinjët e tyre më pak të zhvilluar.

Sumerët ishin gjithashtu ndërtues. Në Mesopotami, nuk kishte gur natyror dhe po ashtu pak kishte drunj dhe kjo ishte arsyeja pse ata filluan të bënin tulla, me të cilat ndërtuan shtëpitë e tyre të vogla.

Shumë shpejt sumerët zbuluan se disa vende fqinje kishin gurë natyralë dhe e treguan tepicën e të korrave të tyre me gurë, të cilët i përdornin për ndërtim në kombinim me tullat.

Sumerët shpikën rrotën e poçarit dhe e përdorën për të formuar një sërë enësh të dobishme dhe të bukura: tas, pjata, gota, vazo dhe kavanoza për mbajtjen e ushqimit. Zbukuruan qeramikën e tyre me modele të mrekullueshme. Ata dinin gjithashtu të skalitnin, të përpunonin bakër, bronz, ar dhe gurë të çmuar.

Sumerët ndërtuan varka të vogla nga kallamishite të thurura, të cilat i mbuluan me lëkurë kafshësh dhe i lyenin me katan. Ndërtimi i varkave ishte themeli i zhvillimit të tyre të mëtejshëm, që tani ishin në gjendje të lundronin nga një breg i Tigris në tjetrin ose lart e poshtë Eufiratit, dhe kështu ishin në kontakt shumë më të ngushtë me zonat fqinje. Me fjalë të tjera, sumerët gjetën një mënyrë për të komunikuar, e cila është shumë e rëndësishme për një qytetërim që sapo po zhvillohej. Lidhja midis vendbanimeve të para të vogla çoi me kalimin e kohës në krijimin e qyteteve të mëdha.



Historia e sumerëve sillet kryesisht rreth qytet-shteteve. Kjo periudhë filloi rreth vitit 3500 para Krishtit dhe zgjati rreth një mijë e pesëqind vjet.

Në njëqind vitet e fundit, arkeologët gjatë gërmimeve në Mesopotami kanë zbuluar rrënojat e qytetit sumerian të quajtur Ur. Meqenëse qytetet e tjera si Eresh, Kish, Eridu dhe Lagash mendohet të jenë të ngjashëm, një pasqyrë e shkurtër e historisë sumere mund të jepet duke treguar historinë e qytetit të Urit.

Ur u ndërtua në bregun lindor të lumit Eufirat. Gërmimet kanë treguar se qyteti ishte i rrethuar nga një mur i lartë tullash dhe një kanal i gjerë që e rrethonte e që përdorej për mbrojtje dhe për trafik. Në lumë kishte një port për anijet tregtare që sillnin mallra nga vendbanimet e tjera përgjatë Eufiratit.

Vetë qyteti ishte i kryqëzuar me rrugë të ngushta të shtruar me tulla të pjekura nga dielli. Përgjatë rrugëve kishte shtëpi, dyqane dhe ndërtesa publike. Në shumë mënyra, shtëpitë sumere ngjanin me tonat, por nuk kishin dritare, pasi që xhami nuk njihet ende.

Përafërsisht në qendër të Urit qëndronte një tempull i madh në formën e një kulle, i quajtur zigurat. Sumerët besonin se perënditë qeverisnin forcat natyrore si toka (Euli), qielli (Anu), uji (Ea), dielli (Shamash) dhe hëna (Nanar). Çdo qytet sumerian kishte perëndinë e tij të veçantë, por gjithashtu respektonte perënditë e tjera. Zoti suprem i qytetit të Urit ishte Nanari dhe i qytetit të Erisit perëndia Ea. Tempulli i madh në

Ur, kushtuar perëndisë Nanar, ishte vendi kryesor ku ai adhurohej.

Në tempullin e Urit ishte një statujë e madhe e perëndisë Nanar. Ajo mbështetej në tri bazamente tullash dhe arrihej me shkallë. Në të dimë se një nga mbretërit e parë sumerianë e ndërtoi atë tempull, sepse disa prej tullave mbajnë emrin e tij. Perëndia Nanar u nderua gjithashtu në shumë tempuj të vegjël përrreth qytetit, dhe kishte gjithashtu disa tempuj të vegjël kushtuar gruas së tij Ningal.

Njerëzit në Sumeri ishin të ndarë në tri klasa kryesore. Priftërinjtë, zyrtarët dhe ushtria përfaqësonin klasën më të lartë shoqërore. Klasa e mesme përfshinte tregtarët, bujqit dhe zejtarët, ndërsa klasa e fundit përbëhej nga skllëverit. Njerëzit më të rëndësishëm ishin priftërinjtë, sepse konsideroheshin shërbëtorë të Zotit.

Te sumerët, viti llogaritej sipas lëvizjes së hënës; kishte dymbëdhjetë muaj të cilët u ndanë në ditë dhe orë. Megjithatë, muajt kishin vetëm tridhjetë ditë secili, që korrespondonte me një vit prej 360 ditësh. Në këtë kontekst, për të përshtatur plotësisht stinën në kalendar, priftërinjtë shpesh lajmëronin se viti aktual do t'i shtohej edhe një muaj tjetër.

Në të kaluarën më të hershme të Sumerisë, nuk kishte mbretër dhe qytetet drejtoheshin nga priftërinjtë e lartë. Por, ndërsa qytetet u zhvilluan dhe barra e menaxhimit të qytetit u bë shumë e rëndë për një prift, ata filluan të zgjidhnin një njeri të

shquar nga kleri për të menaxhuar punët e qytetit. Institucioni i mbretërisë buron prej sumerëve. Mbreti menaxhonte punët shtetërore që nuk kishin lidhje me tempullin. Vulat bëheshin prej balte ose guri, alabastrit ose fildishi dhe të gdhendura me figura perëndish, kafshësh ose njerëzish. Shumë nga vulat e gjetura janë jashtëzakonisht të bukura.

Sumerët kishin një shkrim shumë të pazakontë të quajtur kuneiform. Rreth 3500 vjet para Krishtit, vizatonin piktogramet ose gdhendnin konturat e objekteve në pllaka balte me "penë" kallami. Këto tableta më pas u pjekën dhe u bënë pothuajse të pathyeshme. Një numër i madh pllakash të zbuluara në Ur dhanë një pamje të gjallë të jetës sumere. Piktogramet evoluuan në një përzierje figurash dhe simbolesh që përfaqësonin shqiptimin e rrokjeve. Së fundi, sumerët kishin një lloj shkrimi që përfshinte rreth 600 simbole. Një shënim sumerian, i ruajtur deri më sot, thotë: "Për Nanarin, mbreti i tij është Ur-Nanu, njeriu i fuqishëm, mbreti i Urit, mbreti Sumeri dhe Akkadi, gërmuan një kanal të madh, kanalën e tij të dashur".

Ndërsa numri i qyteteve në Eufirat dhe Tigër rritej, disa qytete më të pasura dhe më të fuqishme sumere u përpoqën të nënshtronin fqinjët e tyre nën sundimin e tyre. Kështu lindi një sërë e dinastive që kishin pushtetin suprem në Sumeri. Nuk është e mundur të paraqitet një pemë familjare e plotë e dinastive sumere. Por, megjithatë, e dimë për disa

sundimtarë. Nga rreth 2700 deri rreth 2280 para Krishtit, Uri ishte qyteti kryesor. Me zbulimin e varrit të mbretëreshës Shab-Ad, që banonte aty, nga shkëlqimi dhe pasuria e atij varri mund të themi me shumë siguri se ajo ishte gruaja e një mbreti të fuqishëm. Ndër gjërat e tjera të varrosura me të ishte një harpë e zbukuruar me kokë demi dhe e veshur me guaska.

Është e mundur që rreth vitit 2370 para Krishtit, fqinji i fuqishëm Sargon I, marshoi në Sumeri dhe e pushtoi atë. Ai mundi mbretërit e Urit, Lagashit dhe qyteteve të tjera, dhe për njëqind e njëzet vitet e ardhshme familja e tij sundoi sumerët dhe akadianët.

Nipin e Sargonit, Naramsini, i quajtur Mbreti i Katër Pjesëve të Botës, e mundi ushtria sumere nga Uri. Edhe një herë, Uri qëndroi në krye të qyteteve sumeriane, nën një dinasti të re, por para vitit 1950 para Krishtit kombet fqinje filluan të sulmojnë qytetet sumere. Fuqia e sumerëve ishte dobësuar shumë dhe paralajmërohej fundi i forcës së tyre ushtarake. Qytetërimi sumer nuk u shemb, por u bashkua me atë babilonas, i cili përmirësoi më tej të gjitha tiparet e tij më të mira.

Sumerët arritën një nivel të lartë organizimi juridik dhe shoqëror në kohën kur Evropa ishte e banuar nga njerëz të epokës së neolitit, të cilët ende nuk ishin të qytetëruar (civilizuar).

**EURO GLASS**  
SAINT-GOBAIN SEKURIT PILKINGTON  
Enveri  
Adr: Fushë Kosovë  
Mob: 044 10 20 10 / 049 145 336  
E-mail: euro.glass@live.com



# Januzi pasi merr çmimin 'Ylli i javës': Llapi lufton për titull



## "Epoka e re"

PRISHTINË, 23 SHTATOR - Skuadra e Llapit arriti tri pikë në përballet ndaj Ferizajt falë golit të shënuar nga sulmuesi me përvojë të madhe Ahmed Januzi.

Federata e Futbollit e Kosovës dhe sponsori i Superligës, Albi Mall, e kanë dhënë çmimin "Ylli i javës" për ish-sulmuesin e Kombëtares së Shqipërisë. Vlerësimi i më të mirit të javës së gjashtë në elitë është bërë nga Komisioni i Veteranëve të Futbollit në përbërje të Enes Shoshollit, Bujar Gutës dhe Avni Shalës. Ky komision vendosi që

çmimi "Ylli i javës" për xhiron e gjashtë t'i jepet Januzit, i cili për 78 minuta të kaluara në fushë ishte lojtari kyç i Llapit. Ai shënoi golin e vetëm në ndeshje, duke ia mundësuar ekipit të tij të arkëtojë pikë të plota në ndeshjen në transfertë kundër FC Ferizaj (0-1).

Januzi u shpreh i lumtur që u vlerësua më i miri i javës. Ai tha se kjo fitore i jep motiv edhe më të madh për ndeshjet e radhës. Sulmuesi edhe një herë ka ripërsëritur se skuadra e Llapit synon titullin e kampiones në Superligë. "Përballja me Ferizajn ishte një ndeshje shumë e vështirë për shumë arsye. Ferizaj është një

kundërshtar që u bënë probleme ekupeve, por është e rëndësishme që ne synimin tonin e arritëm, morëm pikët e plota. Kjo fitore besoj na motivon për ndeshjet e ardhshme që do t'i zhvillojmë në Podujevë. Është gjithmonë kënaqësi të shpalleh më i miri i xhiros, por kjo nuk është meritë vetëm e imja, është e klubit dhe e bashkëlojtarëve, me të cilët është e rëndësishme të funksionojmë si grup. Atmosfera në ekipin tonë është shumë e mirë. Synimi ynë është titulli kampion dhe do të bëjmë më të mirën ndeshje pas ndeshje", ka thënë Januzi për faqen zyrtare të FFK-së.

## SHKURT

### Zhegrova sërish në formacionin e javës në Ligën 1

Edon Zhegrova është duke kaluar nëpër një formë të mirë. Ylli nga Kosova realizoi dy gola në barazimin 3-3 të Lilles ndaj Strasbourgut të shtunën. Zhegrova hyri në formacionin e javës, madje me notën më të lartë nga të gjithë. 8.9 ishte nota nga Sofascore për yllin e madh në fundjavën që lamë pas.

Formacioni: Rulli, Teze, Ndayishimiye, Sagnan, Bard, Zhegrova, Savanier, Tolisso, Guessand, Adams, Moukoko.

### Shkolla 'Zidane' shkëlqen në Basel, fiton vendin e parë

Talentët nga Kosova të grupmohave U9 kanë arritur ta fitojnë vendin e parë në turneun dyditor në Basel të Zvicrës. Futbollistët të Shkollës së Futbollit "Zidane", të udhëhequr nga trajneri i mirënjohur Muhamed Dragusha, mposhtën disa prej ekupeve më të mira helveteke, duke treguar performancë të shkëlqyer. Gjatë gjithë garës këta futbollistë treguan nivel të lartë të lojës, duke mposhtur rivalët me teknikë dhe përkushtim. Madje paraqitja e të vegjëlve në fushën e blertë la një përshtypje të jashtëzakonshme për shikuesit. Fitorja e këtij turneu të madh në Basel është një vazhdimësi e natyrshme e suksesit që ekipi ka arritur para pak muajsh në Shkodër dhe Durrës, duke rrëmbyer trofeun e turneve edhe në këto dy qytete. Këto janë vetëm disa prej sukseseve të futbollistëve U9 të FC Zidane. Kapituj të rinj në historinë e futbollit në të ardhmen pritet të shkruhen nga Diell Shatrolli, Lek Krasniqi, Mal Tmava, Kaon Dibrani, Reis Shala, Ari Celina, Nil Dedinca, AronSheholli, Art Kelmendi e Art Rrahimi.

### Lëndimi i Ter Stegen, Berisha në listën e Barcelonës

Lëndimi i Marc ter Stegenit është një pengesë e madhe për FC Barcelona. Portieri gjerman ka pësuar këputje të plotë të tendinit patellar në gjurin e djathtë dhe pritet të jetë jashtë fushave për tetë muaj, duke lënë Inaki Penan portierin e vetëm të ekipit të parë. Barça mund të drejtohet drejt tregut të agentëve të lirë për ta mbuluar mungesën e Ter Stegenit, por nuk ka shumë kandidatë që mund ta përforcojnë portën e Barçës. Në mesin e portierëve të lirë, mediumi spanjoll, "Mundo Deportivo", ka listuar edhe portierin shqiptar Etrit Berisha, 35-vjeçar. Në mesin e të përmendurve janë edhe: Keylor Navas, Jordi Masip, Edgar Badia, Jiri Pavlenka, Loris Karius, Tomas Vaclik, Tomas Koubek, Alexandre Letellier dhe Kostas Lamprou.

## KB Peja sonte përballet me Maroussin

PEJË, 23 SHTATOR - Peja në mesjavë do t'i zhvillojë dy ndeshjet kualifikuese për FIBA Europe Cup. Peja do të ndeshet me skuadrën Maroussi, ndeshje të cilat zhvillohen më 24 dhe 26 shtator. Të dy takimet do të luhen në Greqi për shkak të problemeve në palestrën

"Karagaçi" në Pejë. Ndeshja e parë zhvillohet sot (e martë) nga ora 19:30, kurse sfida e dytë zhvillohet të enjten nga ora 19:30. Pejanët synojnë t'i kalojnë kualifikueset dhe të jenë pjesë e grupeve në FIBA Europe Cup, ashtu si edhe në edicionin e kaluar, kur kishin paraqitje mjaft të mira në

grupe me dy fitore dhe katër humbje. Pjesë e grupeve të FIBA Europe Cup është konfirmuar Trepça, ndërsa më 27 shtator do të dihen përfundimisht 40 skuadrat që do t'i formojnë grupet për edicionin e ri. Ndeshjet e Pejës transmetohen në faqen e FIBA-s në YouTube.



## Xhaka: Po pësojmë shumë gola

**LEVERKUSEN, 23 SHTATOR** - Jo çdo fitore vlen për Granit Xhakën. Autor i një asistimi në fitoren me përmbysje 4-3 të Bayer Leverkusenit ndaj Wolfsburgut, "ylli" i "Aspirinave" shkund shokët e skuadrës, të cilët i kritikon për performancën e

dhuruar në ndeshjen e fundit. "Duhet të bëjmë autokritikë. Nuk është e mundur që ne të pësojmë tre gola në çdo ndeshje", ka thënë Xhaka. Bayer Leverkuseni ka pësuar 9 gola në 4 ndeshjet e para të Bundesligës, që "përkthehet"

ndryshe në mbrojtjen e katërt më të keqe për momentin në kampionat. "Kjo ka të bëjë me performancën e gjithë ekipit. Duhet të jemi shumë më të kujdesshëm në mbrojtje. Po pësojmë shumë. Me topin ne jemi aq të mirë si më parë.

Sigurisht, ne kemi cilësinë për të shënuar 10 gola për ndeshje. Kjo është shumë e mirë, por nuk më intereson. Dua të di nga shokët e skuadrës pse nuk po luajmë të bashkuar në fazën mbrojtëse", ka shtuar Xhaka.



## Barça me kamp në Prishtinë, drejtori: Ky vend ka shumë talentë të futbollit

**PRISHTINË, 23 SHTATOR** - Nga 20 deri më 24 tetor në Prishtinë do të mbahet kampi i njërit prej klubeve më të mëdha në botë, Barcelonës. Qëllimi kryesor i këtij kampi është zbulimi i fëmijëve të talentuar në futboll që pastaj do ta kenë mundësinë e provimit edhe te klubi katalanas.

Drejtori i Barcelonës për këtë kamp në Kosovë, Diego Perreira, ka thënë për "KosovaPress" se Kosova është vend që ka numër të madh të talentëve dhe se duhet të bëhet vetëm një punë më e madhe për zbulimin e tyre. "Kam parë ndeshje futbollit këtu në Kosovë, të meshkujve dhe femrave. Jam i sigurt që keni shumë talentë. Është vetëm një çështje e zhvillimit të talentit. Këto lloj iniciativash ndihmojnë në zhvillimin e këtij lloji talenti", ka shtuar ai.

Bardh Krasniqi, menaxher i piarit të këtij programi për Kosovë, theksoi se qëllimi kryesor i këtij kampi është zbulimi i fëmijëve që kanë talent në futboll dhe të cilët pastaj do ta kenë mundësinë t'i tregojnë aftësitë e tyre edhe në fazat provuese në Barcelonë. "Ky është kamp i akademisë së




Barcelonës i cili do të mbahet në Kampin Nacional në Hajvali, aty ku ushtrojnë edhe përfaqësueset tona. Do të hapet nga 20 deri më 24 tetor. Aty do t'i kemi maksimalisht, për shkak se Barcelona i ka disa kriteret për të mos shkuar në sasi, por të fokusohemi në kualitet dhe e dimë që Barcelona atë e bën më së miri. Kështu që prej 20 deri më 24 tetor do ta kemi kampin zyrtar të Barcelonës në Kosovë, përkatësisht në Prishtinë. Pas fazës së kampit do të kalojmë në përzgjedhjen e talentëve e cila do të bëhet prej stafit specifik të Barcelonës. 30 prej fëmijëve të

talentuar do të barten në Barcelonë", ka theksuar Krasniqi. Perreira theksoi se talentët që do të përzgjidhen do të kenë një përvojë unike në Barcelonë pas kampit në Kosovë. "Objektivi kryesor nga klubi dhe nga ne është t'u japim fëmijëve të Kosovës mundësinë të shijojnë një përvojë unike, duke pasur këtu për një javë trajnerë të klubit të futbollit Barcelona, pastaj kemi mundësinë të stërvitemi sipas metodës, dhe në vlerat e klubit të futbollit të Barcelonës, i cili është një klub unik në botën e futbollit, një klub ndryshe, dhe krenar që është kaq i ndryshëm", ka deklaruar Perreira.

## Alcaraz: Shumë ndeshje, ndonjëherë kam dëshirë të mos luaj

**MADRID, 23 SHTATOR** - Jo vetëm futbollistët, por edhe tenistët po ankohen gjithnjë e më shumë në lidhje me shtimin e numrit të turneve dhe ndeshjeve, çfarë e bën thuajse të pamundur pjesëmarrjen në secilin prej tyre. Kjo bën që shpesh tenistët të lënë pikë rrugës, duke mos mbrojtur dot fitoret e një viti më parë. Ai që ka ngritur zërin është spanjollja Carlos Alcaraz, numri tre në botë, që nga Munchen, ku po luan në Laver Cup, lëshoi alarmin: "Ne luajmë shumë dhe kjo na detyron të përballemi me probleme fizike. Ato janë frika ime e vetme". Më tej, Alcaraz ka shtuar, duke akuzuar drejtuesit e ATP-së: "Disi ata do të na vrasin duke luajtur kaq shumë. Në këtë



fazë, shumë tenistë të mirë rezikojnë t'i humbasin turnetë e tyre për shkak të lëndimeve". "Ndonjëherë ndodh që nuk dua të shkoj dhe të luaj një turne. Nuk gënjej kur them se jam ndier kështu disa herë. Kam thënë

vazhdimisht se luaj tenisim tim më të mirë kur mund të buzëqesh dhe të argëtohem në fushë", ka thënë Alcaraz, që këtë vit ka luajtur deri më tani 50 ndeshje, duke fituar 41 dhe duke humbur 9.

### SHKURT

#### Ter Stegen, tetë muaj larg fushës së blertë

Një lajm i keq vjen për tifozët e Barcelonës. Portieri Marc-Andre ter Stegen do të jetë larg fushës së blertë për tetë muaj. "Gardiani" gjerman mbrëmë pësoi një lëndim në sfidën ndaj Villarealit, ku i përbotur lëshoi fushën në pjesën e parë. Klubi nga 'Camp Nou' përmes një njoftimi ka konfirmuar se Ter Stegen ka një këputje të tendinës në gjurin e djathtë dhe nuk do të kthehet në fushë për tetë muaj. "Testet e bëra te lojtari i ekipit të parë Marc ter Stegen konfirmojnë se ai ka pësuar një këputje të plotë të tendinit patellar në gjurin e djathtë. Ai do t'i nënshtrohet një operacioni të hënën pasdite. Portieri i Barçës është dashur të largohet nga fusha në 'Estadio de la Ceramica' në fund të pjesës së parë. Gjermani ishte dukshëm i lënduar dhe u zëvendësua shpejt nga Inaki Pena. Këtë sezon kapiteni i Barçës ka zbritur gjithmonë në fushë. Paraqitja e tij kundër Villarrealit ishte e 289-ta me fanellën e skuadrës blaugrana dhe e kaloi portierin legjendar Antoni Ramallets në vendin e tretë në renditjen e të gjitha kohëve të portierëve më të paraqitur për Barcelonën", thuhet në njoftimin e Barcelonës.

#### Guardiola: Kundër Arsenalit morëm atë që meritonim

Trajneri i Manchester Cityt, Pep Guardiola, duke folur për "SkySports", e analizoi ndeshjen e barazuar 2-2 kundër Arsenalit në këtë mënyrë: "Nuk e di se sa lojtarë (të Arsenalit) kishin ngërçe, por kjo padyshim mund të ndodhë në një lojë sfiduese. Ne kishim Ruben (Dias), Manuel (Akanji), Erling (Haaland), por kur ata sulmonin kishin Declan Rice, William Saliba, Gabriel, Riccardo Calafiori, kështu që është shumë e vështirë. Ishin dhjetë lojtarë atje, në mbrojtje. Në fund morëm atë që meritonim", ka thënë Guardiola, i cili foli edhe për humbjen e kohës nga Arsenal. "Ndoshta do të kisha bërë të njëjtën gjë edhe unë me dhjetë lojtarë. Duhet të pyesni Mikel (Arteta) se cila ishte taktika. Ata ishin të mirë me topat e gjatë për Kai Havertz, i cili është kaq i fortë. Në fund patëm durim, patëm rastet dhe shënuam kaq".

#### Fonseca: Fitore në një ndeshje dhe çast të rëndësishëm

Trajneri i AC Milan, Paulo Fonseca, është i lumtur me fitoren që e arriti skuadra e tij në derbi ndaj Interit (2-1). Ai ka thënë se që një kohë të gjatë Milani nuk ka krijuar raste aq shumë ndaj Interit dhe se kjo fitore ishte plotësisht e merituar. "Ishte një ndeshje e rëndësishme, si të gjitha ndeshjet derbi. Nuk fitonim prej kohësh, por kjo ishte e rëndësishme edhe për momentin që po kalonim. Djemtë zbritën në fushë me shumë guxim, e merituan fitoren pasi kisha shumë kohë që nuk shihja një skuadër e cila të krijonte kaq shumë raste kundër Interit", ka thënë Fonseca, i cili ka folur edhe për të ardhmen. "Për mua, në aspektin personal, nuk ndryshon asgjë, pasi unë nuk shikoj dhe nuk dëgjoj se çfarë thuhet. Sigurisht, të fitosh një derbi është gjithnjë speciale. Tani do të jetë një javë ku do të kemi më shumë besim. Është e rëndësishme që djemtë të jenë të qetë dhe të besojnë në atë që bëjnë. Kjo ishte një fitore për ata", u shpreh Fonseca.

## PSG-ja refuzon ta paguajë bonusin ndaj Mbappes

Paris Saint Germain refuzon të paguajë një bonus besnikërie për ish-sulmuesin Kylian Mbappe, që verën e këtij viti la Francën dhe zgjodhi të kalojë si lojtar i lirë te Real Madrid. Sipas gazetës "Le Parisien", PSG-ja po refuzon t'i paguajë Mbappes shifrën prej 55 milionë eurosh që ai kërkon nga ish-klubi i tij. Një gjë e tillë është

konfirmuar nga klubi me një deklaratë. "PSG ka bërë ankim kundër vendimit të komisionit të LFP. Nuk është vetëm çështje e qëndrimit ligjor të klubit, i cili është plotësisht i justifikuar. Është, gjithashtu, çështje integriteti, ndershmërie e ruajtjes së vlerave dhe respektit për klubin parisien dhe tifozët, gjë që

është më e rëndësishme se çdo lojtar. Nga pikëpamja ligjore dhe faktike, lojtari ka dhënë angazhime publike dhe private, të cilat i kërkohet klubit t'i përmbushë. Përveç kësaj, lojtari ka marrë privilegje të paprecedentë nga klubi gjatë shtatë viteve të tij në Paris. Klubi mezi pret që këto detyrime

themelore dhe të padiskutueshme të respektohen në rastin e duhur nëse lojtari vendos ta ndjekë këtë çështje, gjë që do të vinte në pikëpyetje reputacionin e tij", thuhet në reagimin e PSG-së. Më herët, Liga Profesionale Franceze e Futbollit (LFP) i detyroi parisienët ta paguajnë

borxhin ndaj lojtarit. Ata caktuan një afat prej tetë ditësh për pagesën e cila tashmë ka skaduar. Mbappe beson se klubi i ka borxh 55 milionë euro në përputhje me kontratën e tij të fundit me klubin e Ligës 1. PSG-ja këmbëngul se lojtari pranoi të hiqte dorë nga kjo tarifë pasi vendosi të largohej nga klubi si lojtar i lirë në verë.





ROYAL CROWN  
**RC**  
cola

**ANNOUNCING THE 2017  
QUALITY & SALES AWARDS**

**Quality & Sales Award Recipients**  
[Listed in alphabetical order]

- ★ ARC Refreshments Corporation- Antipolo **Philippines**, Quality
- ★ Embotelladora Central S.A **Paraguay**, Quality
- ★ Fabrica de Bebidas Gaseosas Salvavidas S.A. **Guatemala**, Quality
- ★ Fluidi Sh.p.k. **Kosovo**, Quality
- ★ Indústria e Comercio de Bebidas Funada Ltda **Brazil**, Quality
- ★ Interbrand S.A.L. **Lebanon**, Sales
- ★ Kofola ČeskoSlovensko a.s. **Czech Republic**, Quality
- ★ Obi Zulol CJSC **Tajikistan**, Quality
- ★ Partex Sales sales Beverages Ltd. **Bangladesh**, Quality
- ★ Soft Drinks Georgia **Georgia**, Sales

**RC**  
cola  
Columbus, Georgia, USA  
Since 1908

**RC**  
cola  
Columbus, Georgia, USA  
Since 1908  
0.5L

**MEKA**  
HALAL FOOD

# TRADITË QË NGA 1992

